

Visoki predstavnik izražava podršku Deklaraciji iz New Yorka

Visoki predstavnik Wolfgang Petritsch izražava podršku Deklaraciji koju je u New Yorku donijelo kolektivno Predsjedništvo BiH. Osim što je potvrdilo svoju odlučnost da ispuni obaveze iz Daytonskog mirovnog sporazuma, Predsjedništvo je postiglo i dogovor oko određenog broja važnih pitanja s ciljem jačanja uloge kolektivnog Predsjedništva i unaprijeđenja aktivnosti na postizanju ciljeva iz Daytonu.

Prošle sedmice, Visoki predstavnik je u svom obraćanju Vijeću sigurnosti Ujedinjenih naroda, između ostalog, posebno skrenuo pažnju na nezadovoljavajući odgovor kolektivnog Predsjedništva na nacrt Zakona o Državnoj graničnoj službi.

Kao što se u Deklaraciji i navodi, nacrt Zakona o Državnoj graničnoj službi će biti podnešen Parlamentu BiH do 24. novembra 1999. godine, a prve jedinice nove Državne granične službe će biti raspoređene do 31. decembra 1999. godine.

Vezano za ostala pitanja, Visoki predstavnik pozdravlja namjeru kolektivnog Predsjedništva da do 1. marta 2000. godine uspostavi stalni sekretarijat. Takav sekretarijat bi trebao biti od velike pomoći u implementaciji odluka kolektivnog Predsjedništva.

Visoki predstavnik pozdravlja činjenicu da je kolektivno Predsjedništvo potvrdilo važnost državnih ministarstava, kao i njihovu odlučnost da do 1. marta 2000. godine osiguraju potrebna sredstva za rad tih ministarstava, a i njihovu ponovno izraženu podršku usvajanju Stalnog izbornog zakona i njihovu namjeru da poboljšaju među-entitetsku vojnu saradnju.

Kolektivno Predsjedništvo je takođe podržalo paket reformi imovinskih zakona, koji je prošlog mjeseca proglasio Visoki predstavnik. Predsjedništvo se dogovorilo da osnuje zajedničku komisiju entiteta, čiji će zadatak biti utvrđivanje prioriteta u povratku izbjeglica, a koja će Vijeću sigurnosti do 1. marta 2000. godine podnijeti izvještaj o postignutom napretku. Pored toga, kolektivno Predsjedništvo se složilo da će izvršiti pritisak na Vlade entiteta kako bi se obezbjedilo dodatno osoblje, sredstva i kapaciteti za entitetska ministarstva za izbjeglice.

Visoki predstavnik takođe pozdravlja ponovno iskazanu odlučnost kolektivnog Predsjedništva za izradu jedinstvenog pasoša BiH.

Na kraju, Visoki predstavnik pozdravlja činjenicu da je kolektivno Predsjedništvo potvrdilo da korupcija i nedostatak transparentnosti predstavljaju ozbiljne probleme koji blokiraju ekonomski razvoj BiH, kao i njihovu podršku agresivnim mjerama za rješavanje ovih problema.

Ovakav duh saradnje između članova Predsjedništva predstavlja ohrabrenje. Sada je vrijeme da se riječi pretoče u djela. Visoki predstavnik će sa zadovoljstvom raditi u narednim mjesecima sa članovima Predsjedništva na postizanju ovih novih ciljeva.